

客語海陸腔朗讀文章第一篇

【鬧熱个落水天】曾菁怡原作

鬧鐘鈴～鈴～鈴～響咧！大嫲聲喊佢遽遽跣床，再過忍床就會赴毋掣去學校讀書咧。佢目西西伸手掀忒鬧鐘，又過橫落舒適个眠床，毋盼得摻佢分開。欸！毋係天光咧？外背仰還係暗摸胥疏？探頭看出去，原來係天公派烏雲使者來通知佢兜——愛落水咧！

有人認為落水天係麻煩天，出門愛著水衣，無就擎遮仔，係無細義，衫褲又會涿到溼漉漉仔，去哪就毋方便。學生仔最惱無法度出去打球仔、搞寮，一下課先生就掌等，麼人都做毋得出去涿水，所以一看啊著落水，大家就唉唉唧唧，目盯盯仔看等雨水號等歸隻運動坪，實在還慍悴哦！

毋過，落水天對佢來講顛倒係盡鬧熱个日仔。朝晨頭一出門，滿街路就係淅淅个車仔，這片嘩嘩；該片叭叭，像久見个朋友相借問樣，大家相賽講起恁久無看著个思念。該兜行路个人，擎等一支支遮仔花，分雨水一滋潤，就開出五彩个花來，行來行去像比麼人个花較靚。你係聽較真兜，該雨水打在車頂、屋頂、水窟抑係樹葉仔頂高个聲音全部無共樣，有高、有低；有大聲、

有細聲，像唱歌仔分你聽樣。成時，雷公還會用曠燼打燈光，用響雷伴奏，你講，係毋係已生趣？

佢當好在落水天打早就去學校，因為該兜平常時固核核个蜎螺、蟲蟪全部都會趟出來搞水。學校圍牆係紅毛泥作个，壁頂个溜苔青里里仔，落水該下，蜎螺爬上爬下陣打陣，有个相賽看麼儕爬較遽，有个彎來幹去做起畫圖个藝術家，又有个停跔在圍牆頂高享受涿水个清涼，逍遙自在。

落水天出來搞寮个蟲蟪盡好膽，衫褲無著就緊拚拚仔出來搞水，溝壩肚朗朗滾个水流已刺激，幾尾蟲蟪分水沖過去還會搖來擺去，暢到奈毋得。有个蟲蟪大擘擘仔趟到路町來，較砸身个還做得趟轉去；較慍个將就橫在路徑頭，分天公做主咧！

鬧熱个落水天，有人懊惱，有人歡喜，天公無法度分逐儕納意，佢們就愛自家改變想法，不管麼个天都係盡好个天。

客語海陸腔朗讀文章第二篇

【阿姆个鹹糜】黃旭霞原作

起屋个師傅摶做小工个叔姆在禾埕肚無閒直掣。師傅交代叔姆愛摶磚仔淋濕來，起屋時正好用，阿姆看叔姆無閒在該攪沙仔，走去拿水管來淋磚仔，佢就跔等阿姆在脣頭搞水。

阿爸在外地上班無法度長透轉屋下，屋下大細事情全部係阿姆一肩扛起做到兩頭烏，佢兜毋知頭天个三姊妹，想著會有新屋好戴，有自家个間肚好歇，心肝肚時時圓等歡喜个心情。成時阿姆喊搬磚仔、疊磚仔、攞水、攞茶……，佢摶兩個阿哥一定會煞煞來搵手。

下晝兩點零，阿姆在灶下無閒，耳空聽著阿姆拿菜刀切豬肉、香菇、芹菜……洗鑊嫲、開瓦斯……，哇！阿姆愛開始煮點心咧！佢恬恬仔去灶下看阿姆煮點心。阿姆在豬油鉢挖兜豬油放落鑊肚，續等就放浸過水个蝦米摶香菇來菰香，炒出香味以後就放落切好个竹筍過炒加下，正放洗淨个米共下炒，浸過蝦米摶香菇个水乜做毋得打爽，滷滴豆油後過倒兜滾水落去就開始煮糜咧！差毋多半點零鐘糜就煮好，毋過糜燒嬾嬾仔，阿姆又摶歸鑊个糜沾到大面盆裡肚，分糜較遽冷。

「阿霞！搵手拿碗摶箸放在禾埕个矮桌頂。」

排好碗箸，阿姆就喊佢兜三姊妹落去脣頭个矮屋肚搞。阿姆講：「師傅食點心細人仔毋好坐在脣頭看人食，恁樣無禮貌。」走落屋肚，佢拿細凳頭來墊腳，對細窗門偷看師傅佢兜食點心，老師傅添第三碗，做小工个叔姆乜添第二碗，佢心肝肚當急，肚屎咕嚕咕嚕个聲也毋會輸人。阿姆煮該恁大鑊个鹹糜就會無咧！佢个嘴毋知幾時翹到半天高。

佢遽遽走去灶下，該量時阿姆去收該伸無兩碗个鹹糜，阿姆喊佢去搵手收碗箸，佢毋甘願慢慢仔行、慢慢仔做，碗箸放到灶下就愛走咧！阿姆講：「去拿碗來張。」原來阿姆煮好鹹糜，早就有留兜分三個細人仔食。

佢遽遽拿碗去張糜，這下就顧毋得該下發關个面子咧！鼻空摶嘴愛開始無閒哩啲！

一碗好食个鹹糜，有香菇、蝦米、竹筍、瘦肉、芹菜，最重要个係有阿姆惜子女个心。細細佢食毋出來，這下自家做阿姆咧，正感受著這一碗鹹糜个好味道！